



**Orationes Dvae// Clariss. Et Ampliss.// Virorum,// Altera  
Iacobi Sadoleti// S.R.E. Cardinalis, De Pace// Ad Imp.  
Carolvm V.// Altera Io. Baptistae// Campegii Bononiensis,//  
Maioricensium Episcopi,// ...**

**Sadoleto, Jacopo**

**Venetiis, 1561**

Iacobi Sadoleti Oratio De Pace Ad Imperatorem Carolvm Caesarem  
Avgvstvm.

---

[urn:nbn:de:hbz:466:1-68816](https://nbn-resolving.org/urn:nbn:de:hbz:466:1-68816)

IACOBI SADOLETI  
ORATIO DE PACE

AD IMPERATOREM CAROLVM

CAESAREM AVGVSTVM.



**H**VIVS tanti, & tam diffusi gaudii, quo pace per te, Imperator Cæsar Carole Auguste, Christiano nomini data, omnium mortalium mentes incredibiliter exultant, utinam possemus, quemadmodum cuperemus, in agendis tibi gratiis magnitudinem uerbis exprimere. Sed cum eam capere nec animis nostris ualeamus, nulla erit profecto oratio, quæ aut tanto tuo in omnes homines merito, aut tantæ nostræ uoluptati, & lætitiæ par, atque idonea inueniri unquam possit. Non enim nostræ fortunæ duntaxat, quæ legibus extinctis, & æquo iure sublato, insolentum ubique hominum licentia, & detrimentis diuturni belli fractæ erant, & dissipatæ, per te nobis redditæ, & constitutæ sunt: neque ipsa salus, uitaq; nostra, ea, quæ corporis incolumitate continetur, cum nusquam tutum antea neque commorandi locum, neque progrediendi haberet, per eundem te, à metu, à periculis, ab exitiis omnibus seruata, & liberata est. Neque uero in liberis, fratribus, consanguineisq; nostris, quorum sæpe salus nostra nobis uita est charior, à discriminibus præliorum, à metu quotidianarum cædium, ab iniuria, libidine intemperantium hominum, saluis iam,  
&

& incolumibus nobis restituendis, tua liberalitas con-  
stitit: sed quod maximum horum omnium multoq;  
magnificentissimum est, coelum, coelum hoc ipsum  
inquam, portum laborum, ærumnarumq; nostrarū;  
quod religione Dei immortalis, aut cõtaminata ubi-  
que fere gentium, aut interempta iamdudum amise-  
ramus; id nunc tuo diuino, & singulari beneficio, Im-  
perator, recepimus. Atque hæc tua tanta, & tam exi-  
mia dona, quibus Christianas gentes uniuersas es cõ-  
plexus, si per se ipsa separate pendenda essent: cum  
nulla uideatur esse æstimatio, quæ ad pondus earum,  
& dignitatem posset aspirare: tum hoc nobis maio-  
ra, chariora, optabilioraq; fuerunt, quòd inopinato,  
nec expectantibus nobis, in ipsa pene iam extrema  
rerum omniũ desperatione sunt collata. Sic enim ia-  
cebamus afflicti ante, & perdit: sic omni calamitatũ  
genere premebamur; ut nullam iã omnino spem me-  
lius aliquando nobis fore retineremus, ut miseræ il-  
lius, & infelicis uitæ finem non alium, quàm mise-  
riorem etiam mortem expectaremus: cum te, o cle-  
mentis. & optime Imperator, bellum quidẽ urgen-  
te fortiter, atq; feliciter: sed nihilo minus pacis con-  
silia tacitis tuis cogitationibus fouente; quòd te no-  
strorum malorum, quotidianarumq; calamitatũ iam-  
pridem erat misertum: nos exanimes, stupefacti, op-  
pressi nuncio pacis, tuæq; bonitatis, & sapientiæ lu-  
mine nobis oblato, statim à caliginosa, & turbulen-  
ta uita ad serenam, atq; tranquillam, à desperatione  
ad spem, ab infinito omniũ rerum mœrore ad sum-  
mam alacritatem, & lætitiã consurreximus. Quid  
ergo esse potest, uel in diuinis muneribus, uel in hu-  
manis,

manis, quod non secūdum Deum quidem, & secundum illius immensam ineffabilemque bonitatē tibi acceptum referre debeamus? qui uitam, qui salutem, qui libertatem, qui leges, qui hominum societates, qui humanitatis iura, qui pignora naturæ, domesticæque charitatis, & sanguinis; qui agros, qui familias, qui urbes, qui domicilia, pacem, ocium, tranquillitatem, concordiam; qui spem denique cœlestium bonorum, & illius beatæ optatæque immortalitatis, quæ tantum fide Deo pie, sancteque, atque ita uti à maioribus nostris præscriptum est, habenda, retineri à nobis potest; tuo ipsius munere incolumem obtinemus. Quæ omnia prorsus erant nobis ablata, nisi bonitas tua illa restituisset. Equidem dolebam, & pro mea constante, ac perpetua erga Christianam Remp. uoluntate sapissime hoc cogitans angebar, quòd inter te, & inter Galliæ Regem Franciscum, quos probitas, & uirtus, eademque erga Deum religio; tum autē sanctæ necessitudinis uinculum maxime coniuungere, & unanimes efficere omnibus in rebus debebat; tantū, & tam atrox bellum incidisset. Cuius belli quidē auctores, & hortatores qui fuerint; tacendum mihi esse arbitror: quæ uero, & quanta ex eo bello Christiano nomini damna, atque exitia inuecta sunt; quis potest tacere? Nam si ullum unquam fuit bellum gestū à barbaris, quod uel asperitate odiorum, uel cupiditate ulciscendi, uel etiam innata quibusdam gentibus crudelitate, cladem, & uastitatem intulerit nationibus, interneccionem populis, omniaque humana, ac diuina, impetu suo, incursumque peruerterit: Hæc omnia uidimus efficere istud bellum; quod tamen inter

B duos

D E P A C E

duos optimos, atque humanissimos principes gerebatur: cum alter Insubres sibi ereptos, alter subalpinas gentes quereretur: deposceret autem ita uterque id, quod iactaret suum, ut reddendi mentionem non faceret. Neque tamen fuisset ea disceptatio tanti, facileque iniri ratio concordiae aliqua potuisset; si non suspiciones, si non animorum offensiones, si non dicta utrinque, factaque nonnulla, quae speciem iniuriae uidebantur habere, iras, & animos ad perseverandum inflammassent. Quanquam si uerior huiusce mali causa proferenda nobis est, infensus hominum peccatis, & sceleribus Deus, cum suum nomen negligi, suasque passim pollui religiones uideret, hoc calamitissimo bello poenas à nobis sui uiolati numinis exoptauit. Nam quid aliud credi, aut existimari potest, duobus talibus inter se dissidentibus principibus, quorum uterque mitis, clemensque natura, ab huiusmodi stragibus hominum, & ab effundendo sanguine Christiano uehementer abhorreret; nisi Dei occulto, iustoque iudicio hoc bellum inter amicas, & eisdem legibus coniunctas nationes, tanta obstinatione animorum, quantam experti sumus, tam multis annis, tanta cum pernicie Christianorum populorum, & susceptum fuisse, & gestum, & continuatum? Cuius tamen belli si qua nonnunquam interualla fuerunt, uel tacitis induciis, uel consensione factis: quod quidem in tam longo tempore aliquando fuit necesse, defatigatis manibus, mentibusque eorum, qui usu armorum assiduo sua corpora contriuerant: id tu tibi tempus, maxime Imperator, non ad praeteritorum tuorum laborum requiem, sed ad nouorum gloriam iustius adipsendam

piscendam sumpſisti . qui magnis sæpe exercitibus comparatis, maximis classibus instructis, & adornatis, contra nostræ religionis hostes toties iam bella terra, mariq; mouisti. Ex quo patere recte iudicantibus potuit, te, cum arma sumeres aduersus Christianos, necessitate sumere; cum aduersus barbaros, uoluntate. Itaque ad Viennam primum Austriæ urbem, quæ in fratris tui clarissimi Regis Imperio, & ditione sita est, cum ad eam oppugnandam innumerabiles barbarorum copiæ conuenissent, & quòd præsidium in urbe non satis firmum esse uidebatur, ut eam expugnandi magnâ spem cœpissent; quòd eo deinde tanquam Germaniæ, Italiæq; euerso propugnaculo, liberos sibi excursus quascunque in oras, & regiones uellent, fore intelligebant: tu qui tum forte in Italia, & locis Galliæ Cisalpinæ remotioribus eras, re audita, cõfestim subsidio accurristi, manusq; multæ fortium uirorum te eodem secutæ sunt. quorum aduentu, tuæq; imprimis fama, & nominis tui auctoritate hostes deterriti, consilium fugæ statim inierunt, neque putauerunt, cuius absentis nomen sustinere non possent, eius præsentis, armaq; uibrantis uocem, & uultum se laturos. Itaque & tibi Imperator tum iucundum uisu fuit, & nobis auditu certe mirabile, illa infinita hostium agmina (nam ad sexcenta millia armatorum in obsidionem illam conuenisse constabat) nullo audito tubæ sono, nulla aduersa acie prospecta, nullis signis collatis, tantummodo rumore, & fama, aduentus tui, fusa, dissipata, fugata, uelut apum examina, subito euanuisse. Quo quidem tempore nos cum maximis in cœlum laudibus uirtutem tuam tollere-

STIROD

B 2 mus;

## D E P A C E

mus; tum salutem quoque Italiae acceptam tibi referre non dubitabamus. Secuta est maritima expeditio in Africam; quod tu cum copiis cum traiecisses, Tunnetum opulentissimam urbem primariam totius Africae sobolem, atque genus magnae illius, & uicinae, desertaeque; Carthaginis, possessam a piratis, & barbarorum gentium armis, copiisque; ita refertam, ut capi non posse uideretur, ui tamen, & uirtute recuperauisti: maximosque Numidarum exercitus, qui obsessae urbi auxilium ferebant, proelio collatis signis profigasti, partaque illustri uictoria, & rebus compositis, cum dominatum omnium gentium illarum retinere tibi posses, urbem illam nihilominus, & totum regnum pristino Regi suo, qui illinc antea expulsus, in fidem, & patrocinium tuum confugerat, reddidisti. Eoque memorabili facto ostendisti, non uirtutem solum tuam bellis inuictam, sed fidem hostibus etiam sanctam esse. Quid dicam de classe illa maxima, & ornatissima, quam tu, & qui tecum praclaro foedere tum coniuncti fuerunt, Paulus III. Pontifex Maximus (cuius semper mens, & cogitatio ad hoc sanctissimum contra barbaros bellum aspirauit) & Veneti, quibus paulo ante perfidus Turca foederibus ruptis insignem iniuriam apud Corcyram fecerat, comparaueratis? non ne cum opposita hostium classe nauali praelio iamque esset dimicandum, tua classis iudicio omnium, & armis, & animis longe tum superior habita est? Quae tamen subito aduerso coorto uento, ad littora Epiri coacta est deflectere. Cum nemini dubium esset, si praelio res potuisset decerni, quin se ad tuas partes uictoria fuerit deditura. Nam illam alteram tuam  
contra

contra Algerium urbem Mauritaniae maritimam expeditionem ii fortunae casus consecuti sunt: ut uideatur illa cum summi Imperatoris uirtute, & sapientia uenire in certamen, & pro laude, ac uictoria pugnare uoluisse. Cum enim illa urbs loco, manuq; munita sedes esset, & receptaculum omnium praedonum, qui ex ea exire ad populanda littora Italiae, & Hispaniae, & eodem se referre omnibus è locis solebant; tu delendae huius maculae, & periculi Christianis nationibus depellendi cupidus, eò cum maxima, & instructissima classe celeritate incredibili transmisisti: continuoq; expositis in terram militibus, moenia adortus oppugnare coepisti. Cum pugnantibus fortissime tuis, te ipso nullum locum consulendi, adhortandiq; praetermittente, iam pars montis superior, quae oppido imminet, fugato praesidio hostium a cohortibus tuis teneretur, diffidentq; piratae, & oppidani uim tuam amplius posse sustinere; repente obducto densissimis nubibus caelo, magnaq; cohorta tempestate; cum ingentibus procellis maximi effusi imbres; reuocare te milites tuos ab oppugnatione, & quod classis nondum satis erat subducta; etiam compingere in naues coegerunt. Quo in tumultu cum perturbate omnia agi esset necesse: caelo tonante desuper: omnia conuolente uento: pluuiis obruentibus, quis ignorat quam admirabilis tum uirtus tua, quam constans animus, imperturbatusq; extiterit? Cum tu discurrens in omnem partem milites tuos undique colligeres, eosq; uerbis consolarere, & ad conscendendum ante te compelleres. Quò illis tuta a tergo omnia tuo periculo, & diligentia praestarentur. Quis tum non uidit?



D E P A C E

dit? quis non cognouit? in illo infesto casu, qui præter naturam illorum, consuetudinemq; locorum inopinatus acciderat, magni Imperatoris, Ducisq; uirtutem, acrius etiam explorati in aduersis rebus, quàm in secundis? Si is non armis deterritus hostium, non circumuentus consiliis: sed ea habens aduersaria, quibus uis humana obsistere non potest, æquitatem nihilominus animi erga Deum, aduersus hostes fiduciam, in rebus turbidis consilium, iudiciumq; retineat? Quæ omnia tum Cæsar tibi ita affuerunt, ut nullius spectatior unquã uirtus Imperatoris in uictoria, quàm tua fuerit in illa offensione. Nec uero ea in contentione tibi quidquam fortuna eripuit, præter uictoriam, quam tu de hostibus tuis propemodum partam iam habebas. Illud quidem in te eadem perfecit, ut perspicuum omnibus fieret, maioris esse roboris fortunam sapientia, quàm armatos hostes prælio superare. Sed quorsum hæc? quorsum? nempe Imperator, ut rerum præclare à te, fortiterq; gestarum memoriam usurpantes innouemur ad pristinam illam spem, quam de tua eximia in Christianam Remp. uoluntate iam ante susceperamus: qua una spe soliti eramus niti: Sed eadem post nobis multarum concursu calamitatum, quas diuturnum istud, atroxq; bellum, quod tibi cum Galliæ Rege intercessit, populis Christianis inuexerat, fueratq; ablata, cum uirtuti quidẽ tuæ, animoq; non diffideremus: sed de infelicitate nostra conquereremur; tametsi culpa erat illa nostra potius, quàm infelicitas. Cur enim non aperte, planeq; confiteamur? Cum innumerabilibus peccatis, & malis facinoribus, quæ in Christiano genere iam diu

diu

diu uiguerunt, offensa Dei omnipotentis uoluntate, & illius nos clementiam à nostra prouidenda salute auertissemus; & tuam ille à commodis, nostris procurandis facultatem. Neque enim hoc tu Cæsar ita uoluisti, nos miseri ut essemus, nec tua ista præstans naturæ humanitas, animiq; probitas hoc pati potuisset, sicut nec ad extremum quidem passa est. Sed tamen (et si præter uoluntatem tuam) hoc tum nobis ex isto bello euenerat, nihil ut iam superesset, quod uel in uita, uel in fortuna, uel in ipsa Dei præpotentis religione tutum usquam, aut stabile, aut integrum teneremus. Iacebant diuturno bello percussa, & prostrata omnia, quibus cultus uitæ, & humanæ societatis iura continentur: neque erat quisquam tanti mali omnino expers. Italia, Germania, Gallia, Hispania, quæ solæ propemodum nobis, hoc est, populo, nominiq; Christiano à furtis Turcarum uerius dicam, quàm ab armis (quid enim illi unquã sua uirtute potius, quàm dissensionibus nostris sibi pepererunt?) reliquæ erant factæ; gemebant, & afflictabantur uniuersæ: populi ubique exhausti: multæ, & magnæ urbes direptæ; aliæ incendiis, aut deformatæ, aut euersæ; militaris ætas bellorum longinquitate consumpta, humanitas ex animis hominum assiduo usu crudelitatis deleta. Et quod erat malum reliquum, quod in calamitatibus nostris non inesset? nullum certe uidebatur. Cum ecce perpetuus ille humani generis prædo, & acerrimus hostis, Sathan, qui nunquam finit nos requiescere libere, qui semper fraudes, semperq; insidias nostræ uitæ, salutiq; molitur, amplam nactus occasionem inimiciarum inter nos, discordiarumque

no-

## D E P A C E

nostrarum; &, quòd in bonis terrenis nimium occupati, illa cœlestia haud ita appetebamus; genus quoddam hominum nouum excitauit, quod nouo item quodam crudelitatis genere Catholicam Christi fidem, integritatemq; nostræ religionis inter Christianos ipsos labefactare contenderet: & ad cætera tot, tanta, tamq; intolerabilia mala, quibus hæc mortalis uita nostra premebatur, illam etiam, illam omnium teterrimam pestem adiicerent: ut spe cœlestium præmiorum exclusi, cum hinc discederemus, quod omnibus in morte necessario est faciendum, ne in Dei quidem misericordia, qua is propitius peccantibus nobis, sed implorantibus tamen ueniam fieri solet, perfugium haberemus. Atque huius mali semina primum orta in Germania, deinde impunitatem simul, & audaciam præbente hominibus cupidis rerum nouandarum, hac tanta orbis terræ perturbatione, longe, lateq; dispersa, Christianas fere omnes prouincias sic occuparunt, ut ea fruticari ubique largiter, & maiora quotidie obsidere spatia oculis prope cernantur. Et ego, qui ita eram natus, & ab initio ita institutus, ut, cum uitam omnem meam liberalibus primo studiis, deinde etiam sacris, religiosisq; dedissem, illa potissimum ualere semper cuperem, quæ de Deo, Deiq; filio credenda à nobis, & sentienda, quæque item in legibus bonis, & honestis moribus seruanda, & custodienda, sancta Ecclesia nobis diuino spiritu edocta præstituisset; cum uiderem illa contemni passim, & repudiari, quo in mœrore eram? quàm grauius fortunam communium temporum lugebam? quantis animi doloribus afflictabar? Erat omnino tã

uaria,

uaria, tamq̄; acerba omnium malorum facies, ut qua  
 re potissimum angerer, statuere uix possem. Cædes  
 fiebant quotidianæ; has meæ naturæ humanitas ue-  
 hementer abhorrebat: direptiones, incendia, rapinæ;  
 quid poterat cogitari atrocius? populorum oppres-  
 siones, pauperum hominum dispersiones, quibus  
 præsertim opitulari non posses, tanquam uulneribus  
 animum meum fodiebant. Neque hæc oculis magis  
 hauriebamus, quàm auribus: nec spectata maiorem  
 nobis dolorem inferebant, quàm audita: præsertim  
 cum undique, & omnibus horis tristes istarum rerum  
 nuntii ad nos perferrentur. Erat etiam noua species  
 auxilii (si id auxilium, ac non initium exitii grauioris  
 existimandum est) classis Turcarum uelut ad præsi-  
 dium Gallici littoris missa, speculatrix illa quidem no-  
 strarum miseriarum, quæ non alterum è uobis con-  
 tra alterum adiutum; sed utrosque perditos, & exter-  
 minatos cuperet. Nam quid aliud possumus de illa-  
 rum impiarum, & barbararum gentium crudelitate,  
 perfidia, cupiditateq̄; sentire? Sed tamen in tam im-  
 mensa mole malorum omnium, quibus Christiana  
 Resp. premebatur, nullum neque grauius me, neque  
 uehementius angebat, quàm fidei Catholicæ, & Chri-  
 stianæ religionis tanta perturbatio: quippe quæ illam  
 etiam extremam spem, & expectationem pacati apud  
 Deum, felicitisq̄; perfugii nobis auferebat. Nam cæte-  
 ris in rebus, quàm diu hanc in terris uitam degimus,  
 gradus permulti sunt, quorum ex uno si excidas,  
 queas in alio consistere. Fortunæ amissæ sunt, non  
 defunt amici, qui te suis opibus, beneuolentiaq̄; su-  
 stentent. Hi quoque si euanuerunt, habes domesti-

C ca

D E T P A A C O E

ca pignora, quæ tibi in rebus aduersis tamen sint solatio. Enimuero tibi ista etiam, uel natura denegarit, uel fortuna eripuerit, cum incolumi sis corpore, potes noua tibi subsidia alicubi comparare. Morbo, & corporis doloribus, quod extremum iam incommodum est, iaceas oppressus: tibi sic affecto ipsa mors medicina putanda est. Quid? mortis ipsius, uitæque amissionis, quam tamen summum malum complures nominauerunt, ecqua sunt solatia? reliquum unum est dumtaxat, & maximum omnium id quidem. Sed prorsus supremum, & ultimum, quodque nisi obtineatur, tota res plane desperata est, quod iis, qui pie, & cum religione uixerunt, Christianamque erga Deum fidem, sancte, constanterque retinuerunt, cœlum perpetuæ domicilium felicitatis est propositum. Vbi hi cum Deo omnium bonorum, & gaudiorum largitore, cumque eius mundissimis, & præclarissimis comitibus, qui uel ab initio ortus sui in illa cœlesti regione constiterunt, uel è terris postea Dei benignitate, suaque ipsam innocentia, ac integritate in eadem loca sublatis sunt, beato, & sempiterno æuo perfruatur. Hanc spem, leuamentum malorum, incommodorumque omnium, quæ plurima hæc mortalis uita cunctis hominibus affert; quæque præcipue nostra hac ætate innumerabilia, & maxima propter iniquissimam condicionem temporum in nostrum caput fortuna coaceruauit; tu mihi nouator rerum, religionumque eripias? et, cum labore, ac diligentia maiorum nostrorum, sanctissimorum hominum, qui ab Apostolis usque in hæc propinqua nostris temporibus sæcula continuata serie deuenerunt, munita nobis, & complantata

plantata in Cœlum fit uia; tu alios nobis calles, alias  
femitas commonstres? per quas, & breuius, & tutius  
ad eundem locum dicas posse perueniri? Primum  
quis es tu, qui hoc nobis proponere, & polliceri au-  
deas? qua auctoritate uir? qua grauitate? qua doctri-  
na? qua castitate uitæ? ut tibi noua quædam, & inso-  
lita inducenti, assentiri facile, & acquiescere debeat-  
mus? deinde nonne omnibus apertum, & perspicuū  
est (id quod ne tu quidem unquam tegere, aut dissi-  
mulare potuisti) te non quia de religione à nobis dis-  
sideres inimicum nobis esse factum: sed quòd inimi-  
citas antea aduersus nos suscepisses, iccirco post dis-  
sidere de religione cœpisse: ut non salutis communis  
studio, neque intelligentia uerioris boni; neque uero  
ob eam causam, quò hominibus suaderes, quæ pu-  
tares esse sanctiora; sed iracundia; sed contentione;  
sed odio nostri ordinis, cupiditateq; detrahendi, ad  
tantas in fide Catholica seditiones excitandas com-  
pulsus sis? In quo fatendum, ac ingenue est, quod  
negari nec potest. nostra tibi uitia, uariaq; peccata,  
quæ in natione sacerdotum permulta iam increbrue-  
runt, ansam, facultatemq; præbuere, ut eis coarguen-  
dis, & in inuidiam apud populos, crimenq; uocan-  
dis, populariter agere, & alienare animos hominum  
ab honore sacerdotii posses. Quod tu non tamen ex  
Christiana charitate fecisti: neque piis in eo præceptis  
Christi paruisti; cum, si eius leges, & mandata serua-  
re uoluisses, probi sacerdotes amandi tibi fuerint, im-  
probi potius docendi; ipsum autē sacerdotium, quo-  
quomodo quidem cætera se haberent, sanctum, &  
inuiolabile apud populos retinendum. Quòd si etiã

## D E P A C E

aliquo non magno discrimine, neque nostræ æternæ uitæ, salutisq; periculo nouaretur aliqua res earum rerum quidem, quæ ad ueritatem religionis pertinēt, possemus forsitan dissimulare, & tacere. Nunc, cum ueritas nobis in iis rebus uitam, falsitas uero mortem cum miseria æterna afferat; ego ne perpetuum tot sæculorum consensum, tantam auctoritatem Catholice Ecclesiæ deferam? tibi ut assentiar, qui neque in uita, neque in doctrina eximium quicquam, aut singulare possides? quòd etiam si possideres, nunquam tamen tanti cuiusquam auctoritas esset, ut ea auctoritati Ecclesiæ deberet se opponere. Semper enim qui legibus Ecclesiasticis subiecto animo paruērent, doctiores hi multo, & sapientiores habiti sunt, quàm qui nouis institutis, insuetisq; doctrinis peruertere illam, & commutare sunt conati. Nam, si in hoc continenti mille & quingentorum annorum curriculo, ex quo Dei filius humanum corpus assumpsit, Catholica perpetuo Ecclesia eundem sensum, eandemq; fidē de diuinis rebus seruante, ac retinente, quàm plurimi è nostrorum cœtu, ipsius præceptis Ecclesiæ instituti, aditum sibi in cœlum inuenire meruerunt; quid est, cur nos ab illa tuta, & iam explorata uia discedere nunc debeamus? Sin autem nemo adhuc extitit, qui causam recte cognosceret religionis, eamq; nunc primum isti ostendere nobis, aperireq; cœperunt; est ne quod cogitari possit indignius, quod ue magis impium, quàm seruatorem nostrum Iesum Christum, mentem, consilium, & sapientiam sempiterni patris sui Dei, tanto prius, quàm oportuerit, quamq; humano generi expedierit, in crucem sublatum, & mor-

corpus

tem

tem perpeffum effe? Cum hoc diuinum illius in omnes mortales beneficium, qui morte eius uitam ipfi adepti fumus, tam multis deinceps sæculis sterile fui fructus fuerit futurum? At primi id optime fenferūt; nos prolapfi fumus: non in decretis quidem, non in fententia fidei, non in opinione, affenfuq; ueritatis. Aliqua fortaffe in moribus labes facta eft, cui decuit alia subueniri ratione, alio prouideri confilio: omnia quidem certe agi ita oportuit, ut Christianæ tamen unitatis uinculum inter nos ne difcinderetur. Sed hæc, quæ clariora funt, quàm ut ambiguitatem recipiant, omittamus: ad illa redeamus, quæ nobis a principio fuerant propofita. nempe quòd cum tam misero effet in ftatu Christiana Resp. nec illi extremum uix fpiritum trahenti, alia re ulla, quàm pace uefta inter te, Cæfar, & Regem Galliæ ferri fubfidium poffet, repente, nec opinato clemēs, & misericors Deus res desperatiffimas, animosq; amborum ueftum diffidentiffimos ad pacem, ad concordiam, ad priftinam inter uos beneuolentiam, charitatemq; adduxit, ut cum fpem omnē falutis nos penitus abieciffemus; tum maxime fperare, & erigere animos inciperemus. Et folent quidem huiufmodi effe Dei omnipotentis dona, opinionibus inexpectata, temporibus opportuna, magnitudine immenfa: ut nobis tum præcipue, cum uiribus noftris, confiliisq; diffidimus, bonitas diuina fubueniat: quòd omnis ei à nobis gratia, omnisq; noftra falus accepta referatur. Sed, quoniam id quoque fuit neceffe, ut amborum Regum mentes diuinis fponfe inspirationibus confentirent: iisq; ambo confenfere: eft quidem uterque ueftum egregiam laudem



## D E P A C E

dem meritis : sed tua , Cæsar, in hac re præcipua fuit gloria . Tu enim pacem , & bellum in potestate habebas , & utro te dedisses , eò te fortunam sequi Reip. erat necesse . si bellum maluisses , ut semper esset misera : sin ad pacem te inclinasses , tum ut suorum ornamentorum (si qua ei tamen reliqua adhuc sunt) retinendorum , aut etiam recuperandorum , quæ plurima illi sunt amissa , spem aliquam conciperet . In qua ancipiti futuri euentus expectatione cum uehementer animi penderemus , essemusq; tamen ad metuendum , quàm ad sperandum propensiores ; aut si id , quod res est , apertius est dicendum , timor plane in eo spes nostras obrueret , subito , & inexpectato Dei immortalis munere , tua te ad hanc optimam partem , Carole Cæsar, inducente prudentia , pietate , uirtute , lætissimus confectæ pacis nuncius per omnes oras , regionesq; Galliæ , Italiæ , Germaniæ , Hispaniæq; cucurrit . Quo nuntio excitati animi cunctorum sunt : & ad cœlum omnes cum uoluptate intuendum uultus suos erexerunt : quos antea timor , & omnium rerum desperatio in terram illis defixerat . Atque ego non dubito , quin tu hac semper mente , & uoluntate fueris , ut per te potissimum uelles communi Christiani nominis saluti esse consultum . Quid enim aliud tua illa inuicta toties iam arrepta contra hostes fidei Christianæ arma nobis indicabant ? quid classes ? quid exercitus ? quid tuum ipsius corpus , terra , atque mari omnibus sæpe periculis expositum a te , atque obiectum ? nisi te ea semper cogitare , moliri , agere , quibus maximam gloriam tuam cum summa Reip. utilitate coniungeres ? *mob* tare

tare me, rectius nunc dico, mihi plane fuisse cognitū, cum non cōiectura mihi res pendenda sit; sed isti tuæ optimæ, præclarissimæq; uoluntati penitus sim conscius. Qui quidem tecum, & Nicææ bis: cum tu eò, & Rex Galliæ Franciscus, Paulo Pontifice Maximo uocante, ob causam agendi de pace conuenissetis: & Buffeti semel in Placentino agro: quò te eiusdem Pontificis rogatu contuleras, congressistis, in uariis, multisq; sermonibus facile perspexi, nihil te habere consiliis tuis magis propositum, quàm exactionem barbarorum, restitutionemq; ueteris Imperii, & Christianæ religionis propagationem. Quarum rerum pulcherrimarum, atque amplissimarum conatum, atque curam, cum magno quidem tuo cum dolore, hæc tibi cum Rege Gallorum dissensio suscepta impediret; recordor me cum multa tibi suasisse, quæ pertinebāt ad pacem; tum hoc imprimis dixisse, constanterque affirmasse, non posse mihi persuaderi, quin te unum Deus ex tam multis principibus, qui tot ante fuere sæculis, legisset, per quem uellet honorem sui nominis, & inter Christianos sanctis moribus reducendis, & inter barbaros impietate excidenda, ubique propagari: cum is tantam Imperii potentiam, cum tanta in te, & magnitudine animi, & prudentia copulasset: neque credibile esset rebus Christianis, & extrinsecus, & intra iam profligatis, & prope perditis, quin mediatum, & paratum iam afforet ab ipsius Dei prouida, & misericordi mente, in te, & in tua uirtute, auctoritateq; præsidium. Quamobrem te hortabar, ut ne tempus amitteres: & cum nosses hoc tam præclarum de te Dei omnipotentis iudicium, cum eo Rege bello

munus

D E P A C E

bello ne contenderes, quo cum tibi arcta affinitas iam  
 esset: summæ autem beneuolentiæ, summæq; neces-  
 situdinis charitas facile coire inter uos, & conciliari  
 posset: in eos autē hostes tua arma conuerteres, quos  
 nec amicitia tibi adiungere propter illorum impiam  
 contra sanguinem, & nomen nostrum crudelitatem:  
 nec foederibus obligare, propter eorundem perfidiā  
 posses: & qui præcipue te ipsum propriis iniuriis sæ-  
 pius iam laceffissent. Quibus tum meis suasionibus,  
 & precibus memini te Imperatoria illa tua grauitate  
 decentem leniter admodum, & sedate respondere:  
 Cum hæc diceres, summum quidem tuum studium,  
 summamq; cupiditatē semper fuisse bello barbaros,  
 & Turcas insectandi, eiusq; tui animi satis multa te  
 existimare signa, atq; indicia Christiano nomini abs  
 te fuisse data. Sed tamen non posse in præsentia pati  
 dignitatem tuam, cum te Rex Galliaë imparatum, &  
 absentem, & propter inducias, quæ inter uos fuerant  
 dictæ, nil tale suspicantem, improuiso bello laceffif-  
 set, nonnullaq; tuæ ditionis oppida subito aduentu  
 suo occupauisset; ut tu eam iniuriam placato animo  
 ferres. Cum si id ita faceres, quasi ulciscendi, & uin-  
 dicandi tibi non esset facultas; & inimici tui animos  
 aucturus, & in tua existimatione maculam contractu-  
 rus esses. Multa præterea dixisti, cur tibi tunc firmā,  
 & ueram pacem cum eo sperare non liceret. Quæ ego  
 audiens equidem diluere conabar, ueneram enim a  
 Gallica Legatione recens, quò me Pontifex Maxi-  
 mus pacis suadendæ gratia ad illum optimum certe,  
 & omni humanitate ornatissimum Regem miserat: il-  
 lius animum perspexeram: a studio pacis eum non  
 alienum

alienum intellexeram . Quæ cum commemorare , & persuadere cuperem , necesse mihi ad extremum fuit orationis grauitati, & firmitati tuæ uoluntatis cedere: tantum discedens tibi dixi, dolere me quidem peruehementer, quòd exoptatos fructus præstantissimæ uirtutis tuæ istæ sociales inter uos discordiæ nobis interrumperent: sed tamen , quòd spe certissima tenerer non frustra te à Deo talem, & tantum Principem nobis tributum esse, sed ut esset qui Christianos populos à barbarorum iniuriis, contumeliisq; defenderet: facturum me (quod in me esset) ut assidue dies, & noctes omnipotenti Deo pro uita, & salute tua supplicarem. Quod feci, Imperator, & facio, tantoq; posthac amantiùs, & studiosius facturum sum, quanto intelligo, pace inter uos constituta, & meorum exitum uotorum quotidie magis, & tuæ in nostra salute stabilienda speratæ laudis appropinquare. Sed, quod dicebam; cum abiissem à te mœrens, mihiq; ob animū tua durior quidem illa, quàm tum mihi debere esse uidebatur, belli cum Rege Galliæ gerendi deliberatio uersaretur: non tamen uidi; id quod si uidere, & perspicere potuissem, non ego humano, sed diuino quodam ingenio fuisset, præditus: parq; (quod optandum est magis, quàm sperandum) tuæ incredibili sapientiæ mea mens extitisset: non uidi (inquam) in uolucrum abstrusum, & multiplex, prudentissimarum cogitationum tuarum, quæ cum eodem omnes intenderent, quò nos cupiebamus: cum tibi hoc unum esset maxime semper propositum, ut propugnationē populi Christiani aduersus Turcas susciperes, itinera tamen, atque uias, quibus ad illius consilii exitum

*insubglutimur*

D possit

## D E P A C E

posset perueniri, tu solus acutissime cernebas: nos  
 ignorabamus. Fateor, Carole: non diffimulo: latuit  
 me altitudo, & consilii, & animi tui; quæ ne nunc  
 quidem mihi satis perspecta esset, nisi eam exitus ipsi  
 rerum patefecissent. Itaque quod solebamus sæpe,  
 aut cum aliis loqui, aut per nos ipsi sentire, cum de  
 te, deq; tuis rebus gestis mentionē haberemus, quod  
 in omnibus fere congressibus, & circulis cōtingebat,  
 donatum esse à Deo nobis Principem, cuius similem  
 alterum uix ulla unquam habuisset ætas: cōsilio præ-  
 cellentem, belli armis inuictum, nihil animo conci-  
 pientem, nisi quod altum, quod insigne, quod glo-  
 riosum existeret: tum humanitate, continentia, cæ-  
 teris uirtutibus singulariter ornatum: quæ quidem  
 summū Principem uirtutes, Imperatoremq; deceant,  
 quiq; magna iam indicia uirtutis suæ, & erga Deum  
 pietatis populo Christiano dedisset, pro cuius Dei no-  
 mine, honoreq; tutando, tot iam aduersus barbaros  
 bella suscepisset; totiens mare transisset; tam præcla-  
 ras domum uictorias reportasset: Constantinum illū  
 primum, aut Theodosium, aut illū etiam ipsum, qui  
 uestri generis, & nominis fuit auctor, Carolum Ma-  
 gnum uidebamus tanquam è Cælo nobis redditum,  
 & restitutum in te possidere: quin etiam maiora de te  
 sperabamus, quàm de illo accepimus. In hac tanta  
 commemoratione laudum, uirtutumq; tuarum in-  
 rat tamen quiddā, quod desiderabatur. Nosti enim,  
 Cæsar, hominum mores, atque ingenia: quò plura,  
 & maiora in quopiam ornamenta conspiciunt, hoc  
 magis ad requirendum, si quid abest, conuertuntur.  
 Nec uero in tanta luce laudum tuarum, quæ te cir-  
 cumfulgebant,

cumfulgebant, quicquam poterat esse non apertum, quod dissimile esset partium cæterarū. Lenitas quædam in te maior, & clementior animus ad deponendas offensiones requirebatur: ut cum sociales discordias Reip. condonares, ad gerenda sanctiora, & magis necessaria bella expeditior fores. Cuius quidem communis pene nostrum omnium opinionis de te, & iudicii nunc me uehementer pudet. Clementiam ne in te nos, & placabilitatem quærebat? aut hæc eximia uirtus in tuis tot cæteris ornamentis te una deficiebat? Tu ista natura, isto genere, isto animo, ista sapientia ferus, & implacabilis esse posses? quid essent, Cæsar, reliquæ tuæ uirtutes tantæ, & tam multæ, nisi tu eas humanitate, clementiaq; condires? Nam arma quidem tractare fortiter, gerere res constanter, terribilem esse hostibus, inuictum in rebus aduersis, acrem, & persequentem in secundis, complures ueterum ducum, atque Imperatorum, & studuerunt, & ualuerunt. Illud, illud in paucis fuit admirabile, illud laudandum, si qui extiterunt, qui in magna fortuna mite ingenium, & moderatum animum potuerint retinere. Cuiusmodi fuisse illos accepimus, quos paulo ante ex tam magna copia tam paucos commemorauimus. Ex quibus præcipue Carolus, cuius tu & nominis, & Imperii hæreditatem, tot sæculis post affecutus es, tanta & pietate erga Deum, & benignitate aduersus omnes, qui ad eum adibant, fuisse dicitur: ut cum plurima, & maxima bella Christianæ propagandæ religionis causa confecisset, plures gentes tamen propter humanitatem eius, quam propter potentiam ad fidem Christi confiterentur se esse con-

<sup>sup</sup>  
D 2 uersas.

D E I P A C E

uerfas . Hunc igitur cum habeas specimen , & exemplum uitæ bene dirigendæ, immitis tu, & inhumanus esse possis ? res ipsa indicauit , cuiusmodi fueris : qui cum intulisses Galliaë bellum, lögeq; introrsum cum tuis copiis in eam penetraffes, ad Lutetiaë Parisiorum mœnia propius accessiffes, magnis iam rebus gestis , compluribus munitiffimis oppidis, ui, & oppugnando in tuam ditionem redactis : quanquam Francisco Rege singulari uirtute, ac uigilantia omnibus tuis conatibus obsistente: tamen cum à spe uictoriaë tua opinio non abhorreret, ut primum tuæ existimationi satisfactum esse duxisti, sensistiq; tempora Reip. hoc postulare , nec communem Christianarum gentium salutem uestra huiusmodi diffidia amplius perferre posse : præter omnium mortalium spem, & expectationem repente pacem cum ipso Rege Galliaë, hoc cupiente , & optante complexus es , atque eiusmodi pacem, per quam non uetus modo uestræ necessitudinis sanctitas renouata , sed magnis accessionibus charitatis, & amicitiaë aucta etiam, & cumulata esse uideatur . Quid ergo est? cur hoc idem cum posses, de principio non egisti? cur tantum moræ, tantum formidinis , tantum malorum , & periculorum intercedere passus es? in quo nobis orantibus, & supplicantibus, ut paullo ante dicebam, uidebaris esse durior? Patere, obsecro, Cæsar, tuas à me cogitationes explicari; & illa alta, magnificaq; consilia, quæ in intimo pectore admirabilis tuæ prudentiaë inuolucris tegebas , in lucem proferri : si tamen hoc , nec tua Maiestate indignum, & fructuosum cognitu omnibus futurum est. Neque enim est ulla disciplina præstantior, quàm ea, quæ

quæ ex optimi Principis consiliis, atque factis, non solum homines ingeniosos, & bonos; sed ipsum etiã uulgus erudit. Ita igitur cogitasti. Cum talis esses, tantusq; Princeps, & is, qui amplissimam tuam potestatem magnitudine semper animi, fortunam uirtute superauisses; non posse dissimulari abs te, inultumq; dimitti, quòd te Rex Gallia inexpectato bello laceffisset. Quid ergo? ita ne uindicare parabas, ut sanguinem, & uitam Regis necessarii peteres? Minime. An illo expulso è Regno, & exturbato, ex calamitate illius crescere, & opes tuas amplificare uolebas? ne hoc quidem tibi fuit tum propositum. Quæ igitur caussa, quæ ratio tam implacabilis dissidii? Cũ Paulus Summus Pontifex, missis ex nostro amplissimo sanctæ Romanæ Ecclesiæ Cardinalium ordine ad te, & ad Gallia Regem Legatis, ad pacem utrunque uestrum hortaretur, egoq; tum Legatus ad Christianissimum Regem uenissem; animumq; illius ardentem dolore, & iracundia, quòd legatos suos contra fas (ut aiebat) à tuis interfectos querebatur; eamq; sibi causam capiendorũ armorum fuisse dicebat, multis tum rationibus ad studium pacis, concordiaque flexissem, in quo (dicam enim libere id quod cognoui, & sensi; nec laudibus maximi Regis fidei meæ testimonium denegabo) uisus est mihi Rex ille, ad summum, excellensq; ingenium, quo largiter à Deo, & à natura est instructus; summamq; omnium rerum peritiam, quæ res uel ad pacem, uel ad bellum pertineant, tantam adiunctam habere probitatem animi, & erga Deum ueram, certamq; religionem, ut dignissimus illo regali fastigio, indignus ea dissensione, & discor-

monibus

discor-



## D E P A C O E

discordia, quæ illi tecum erat, ab omnibus iudican-  
 dus esse uideretur. Cum igitur ex una parte res essent  
 paratæ, Rexq; Franciscus pacem æquis conditioni-  
 bus non respueret; quarum ille conditionum Ponti-  
 ficem Maximum arbitrum, & moderatorem esse uo-  
 lebat. Cum ego proximo hoc tuo in Italiam aduen-  
 tu, tecum congressus multis uerbis suasiffem pacem,  
 cunctiq; te rogarem, omnesq; & noti, & ignoti hoc  
 idem à te peterent, nec uideretur Christiana Resp.  
 multis iam lacerata, atque uexata immanium Turca-  
 rum non uictoriis, sed furtis, sine pace uestrum, &  
 sine concordia posse consistere: tu tamen cœlans ani-  
 mi tui arcanum, quod salutare, & commodum Reip.  
 Christianæ ipse intelligebas, te inexorabilem cunctis  
 præbuiſti, omnium preces tua perseuerantia oppres-  
 ſiſti: confirmasti te bello iniurias tuas persequutu-  
 rum: conſtaſti maximos exercitus: armaſti, cum om-  
 nes tuam lenitatem requirerent, illamq; uim, & im-  
 petum incitati animi tui in Turcas potius conuerti  
 omnibus uotis exposcerent. Quem tamen eundem  
 finem tu te tibi, neque alium prorsus ullum, in illis  
 armis, delectibus, totoq; apparatu bellico proposue-  
 ras. Non enim bellum contra Galliam suscipiebas,  
 ut nationem illam & religiosam, & fortem funditus  
 euerteres: nec iniurias tuas eo animo ultum ibas,  
 quòd eas lui sanguine Christianorū uelles, sed quòd  
 nominis tui ingens, amplaq; auctoritas, si contume-  
 liam lento animo tulisses, in suspicionem humilis, &  
 demissi animi uidebatur uētura, præsertim apud Tur-  
 cas, qui insolentiam, & iactationem, fructum altio-  
 ris fortunæ cum statuunt, hanc Christianam mansue-  
 tudinem,

tudinem, & placabilitatem, sanctaq; cœlestis doctrinæ præcepta non agnoscunt. Quò igitur aduersus illos terribior exurges, cum hi uiderent te nulli ui, nullo periculo, nullo labore frangi, quominus hostes tuos omni ope, omniq; opera, nuiquam defesso animo persequerere: iccirco Gallica expeditio à te suscepta est, non oblectamentum iracundiæ tuæ, sed firmamentum auctoritatis. Atque hoc illud fuit, in quo nos decepti sumus. Non enim tam profunde nostras cogitationes immerfimus, uicitq; in eo sapientia tua omnium hominum prudentiam. Nam nos pace tibi cum Christianissimo Rege facta, cum paratas copias, & omnia tibi prompta ad gerendum barbaricum bellum putaremus; tu altiore multo, abstrusioreq; consilio, si studium tuum ad nostra studia tunc accommodasses, maximum tibi belli instrumentum, & certissimum pignus futuræ uictoriæ, auctoritatem abfuturam intelligebas. quæ certe iacturam, & diminutionem esset passa, nisi & nos, & cæteri, & omnes denique homines, ipsiq; in primis Turcæ ipso euentu rerum docti perspexissent, quicumque tuam dignitatem uiolasset armis, eum de Imperio tecum etiam, & de uita esse dimicaturum. Hanc auctoritatem igitur, ut ea tibi salua, incolumisq; maneret, omni cum cura prouidisti, præsidiumq; fortissimum tuæ potentia, dignitatis, nominis, afferre aduersus hostes tecum uoluisti, sine quo nimirum res magnæ geri non possunt. Nam quod ad potentiam attinet, imperas tu quidem, Cæsar, fortissimis nationibus; eaq; prouinciæ, quæ semper uiris, semper animis excellere iudicatæ sunt, Italia, Germania, Hispania,

nia,

## D E T P A A C O E

nia, tibi dicto sunt audientes: ex quibus, legere optimos milites, quales ex reliquo orbe terrarum non queant legi; magnosq; ex illis cōficere exercitus: posse fidere classibus maria: suppeditare copias, & comatus possis. Veruntamen ista, nisi tua insigni prudentia, consilioq; regerentur, ad bellum per se gerendum non satis essent idonea. Animo enim opus est, qui ista omnia gubernet, & prouido, & sapiente: quibus tanquam acies gladio, sic ille copiis, apparatus, potentia, uim, & acumen præbeat. Ipsa uero prudentia, quæ ferme domina est rerum cæterarum, & quæ, in quocunque Principe inest, magnum eum bonis, & uenerabilem, formidolosum impiis, atque improbis hominibus facit, quam in te Imperator summam esse, & singularem cernimus: quæ quamuis polleat uehementer in omnibus rebus humanis, tamen ea quoque interdum fortunæ subiecta est: præsertim si cum audacia, & cum temeritate ueniat in certamen: quod sæpe in bellis accidere est necesse. Non enim raro consideratissimi Duces à proiectis, & præcipitibus superati sunt: & sunt tamen aliquando apud Barbaros nonnulli, qui sua consilia nostris consiliis opponant. At uero hæc, de qua iamdudum loquor, auctoritas, quæ est de tuo insuperabili ingenio, deq; infatigabili in contentionibus omnibus animi uirtute, cum magna celebritate, & gloria tui nominis, in animis gentium impressa opinio: hæc inquam ea ipsa est, quæ te non inuictum solū, sed terribilem ultro hostibus tuis facit. Quam tu, quod reiectis superiore anno precibus omnium nostrum, consiliis, quæ de ineunda cum Rege Gallorum concordia tibi proponebantur, posthabitis,

bitis, gerēdo potius bello seruare tibi incolumem uoluiſti: nimirum plurimum uidifti, maximumq; propugnaculum tuæ exiftimationis, & nominis non reſtituiſti modo, uerum etiam auctius, munitiusq; reddidiſti: cum tamen iniurias tunc acceptas commemorans, & obſtinatum animum ulciſcendi præ te ferens, aſperitatem quidem in uerbis, atque uultu, in animo autem clementiam, & humanitatem contine- res. Quæ fuit ratio (ut antea dixi) nobis quidem omnibus abſcondita; ſed tua, Cæſar, inſigni prudentia uehementer digna. Non enim Chriſtianam Remp. tum lædebas, ut quibusdam forſitan uidebare: ſed pro Chriſtianæ Reip. ſalute ſeueritatē illam ſuſcipiebas, maiorisq; boni nobis conciliandi cauſa, minus illud bonum tunc negligendum ducebas. Et re uera nullum neque maius, neque præſtantius Chriſtianæ Reip. poteſt eſſe bonum, quàm auctoritas, Cæſar, tua, & iſte animus, quo eam totam conferre in barbarorum excidium, & reſtitationem ueteris Chriſtianæ dignitatis uiſ. In quo opere profecto ſancto, & memorabili, illa tibi futura eſt & acies fortiffima, & exercitus robuſtiſſimus: non enim unquam auctoritas uincitur, nec poteſt ipſa non uincere: quippe quæ uel procul, & antequam ueniat aduerſariis in conſpectum, ipſo rumore, & nomine bella conficere ſoleat, eripiatq; hoſtibus, & conſilium, & audaciam: ut cū audierint armatum incedere contra ſe Principem illum, Imperatoremq; que, quem ſciant eo animo bella ſuſcipere ſolere, ut aut uincere ipſe, aut omnia abii- cere ſit paratus, qui ſibi confidat, nullum noſcat timorem, concedat omnino nemini, fortunæ ipſi non  
E succumbat:

## D E P A C E

succumbat: atque hæc non temeritate, nec subita concitatione, sed consilio agat, sed sapientia, sed magnitudine animi, sed longo usu bellorum; in quibus iamdiu sit multis, & magnis non expeditionibus solum, sed uictoriis eruditus: concidant statim animis, orbentur omni consilio, casumq; propinqui periculi sui uehementius perhorrescant. quos nunc sic affectos tua ingens auctoritas, paxq; cum Christianissimo Rege, maximo in nos omnes Dei omnipotentis dono opportunissime facta, sine ulla dubitatione tibi traditura est. Quamobrem, Carole Cæsar, honore Imperator, uirtute uere Auguste, cogita iã ipse, quid tibi deinceps sit ad deliberandum, & ad gerendum reliquum. Quanquam quid, ut cogites, peto? quid, ut ipse tuimet memor sis, postulo? quod enim unquam consilium magnanimum, & sapiens à tua ista mente, & cogitatione abfuit? Sed, quo soleimus modo agere erga Deum, cum quid illum iam certum quid facturus sit, cum precibus tamẽ, & cum pietate poscimus: eodem agimus erga te; ut Christianæ Reip. extremo illius tempore, & extrema pene iam necessitate subuenias. Hoc quidem ipse ita cogitas: hoc habes propositum tibi, & constitutum: sed tamen liceat nobis implorare opem tuam: liceat commiserari dolores nostros: liceat uulnera detegere, quibus afflicta Resp. & lacerata est, nec tu ea non cernis: quis enim acutius, aut altiore ex loco prospicit? sed ideo nos illa proferimus, quò tu in illis uindicandis non solum spectes gloriam tuam, sed salutem etiam nostram. Et sane in primis sanctæ religionis causa à te est suscipienda. Cuius moderator quidem, & arbiter Romanus Pontifex

Pontifex esse debet: qui suam huiusce rei uoluntatem etiam bis indicto Christiani nominis concilio est testatus. Sed sine presenti ope tua; sicut re ipsa perspicuum factum est; nihil neque institui recte, nec ad optatum exitum perducere potest. Huc igitur in primis animum tuum conferas, & conuertas oportet. Hæc enim causa ea est, in qua (nisi fallor) cæteræ quoque causæ, quæ ad communem salutem constituendam pertineant, cunctæ complexæ sunt. Auerfo enim à nobis propter istas innumerabiles dissensiones, quas ipsi de eius religione habemus, sine dubio Deo, qui unitatem, & consensum præcipue à nobis postulat, quid potest reliquis in rebus remanere apud nos inuiolati, atque sancti? Itaque & ius iamdudum è moribus hominum exterminatum est, & iniuria introducta, tantisq; simulationibus, odiis, suspicionibus, infidiis referta hominum uita est; ut eius bene agenda, neque ordinem rectum iam, nec modum inueniamus. Quæ tot mala, tamq; perniciofa, si uere, & sancte, sublati diffidiis religio constituta fuerit: neque ea solum in rectis opinionibus, sed in bonis etiam, ac ipsorum præsertim sacerdotum moribus restituta, sicut nebulae oriente, & se attollente Sole; sic illa Deo ad nos clementibus iam oculis, & serena fronte conuerso, è uestigio dissipabuntur: lucemq; nobis integram, puramq; relinquent. Neque tu hoc tibi, Cæsar, graue, & laboriosum esse duxeris. non est in disceptationibus, nec in controuersia res. omnia, quæ ad ueram Dei notionem, uerumq; cultum pertinent (in quo quidè uno nostra perpetuo salus sita est) singulari maiorum nostrorum prouidentia, & Spiritus sancti ope, qui

D E P A C E

semper Catholicæ Ecclesiæ comes affixus est, sanctif-  
 fimis decretis, & præclarissimis legibus sancita sunt.  
 Qua ratione nos gerere; quod cæteris exemplum ui-  
 tæ bene, pieq; agenda in nobis ipsis constituere: quæ  
 de Deo sentire, & de diuinis rebus debeamus, iam-  
 diu est nobis diligentissime, ordinatissimeq; præscri-  
 ptum. A qua præscriptione qui discesserunt, miseri  
 ipsi, & errantes; qui agunt, & egerunt, ut alii quoque  
 discederent, ii impii merito semper sunt iudicati. Nec  
 uero in altercationibus, & diffidiis inter nos: sed in  
 charitate, mutuaq; benignitate, beata à Deo nobis,  
 & immortalis uita est proposita. Quamobrem non  
 erit hic tibi mora, aut durior aliquis labor, quomi-  
 nus recipere te celeriter ad bellicas curas, & cogita-  
 tiones possis. moribus enim correctis, sacerdotumq;  
 potissimum, quorum inuidia tot, & tam perniciosæ  
 ubique turbæ, grauesq; seditiones cõcitatae sunt, om-  
 nibus fiet iam discordiis, & dissensionibus finis. Et  
 qui nunc acerbe admodum, & pertinaciter inter se  
 dissident, in unum omnes sensum, unamq; uolunta-  
 tem conspirabunt: quæ uera, & propria Christiani  
 nominis est professio. Atque huius quidem præclari  
 muneris, atque operis Romanus Pontifex, Dux, &  
 auctor futurus est, pro loco, pro honore, pro ea au-  
 ctoritate, qua ab Deo est munitus: sed tua quoque  
 uoluntas, Cæsar, & Galliæ Regis tecum, uehemen-  
 ter est necessaria. Vos enim duo ii estis, quos populo  
 suo Deus gubernatores potissimum præfecerit, & ma-  
 gistros: quorum Imperium, & auctoritatem reliquus  
 Christianus orbis sequatur: qui antea uestris discor-  
 diis omnia perturbabatis, iidem nunc in unam senten-  
 tiam,

etiam, unamq; mentem conuenientes, tanquam conflatas amore, & beneuolentia animis, omnia estis in integrum restituri. Quid enim aliud nobis polliceri debemus ex ea pace, quã sine dubio inter uos, non ulla humani consilii, aut ingenii uis, sed Deus ipse, ipsemet (inquam) Deus, salua dignitate utriusque uestrum constituit? Non ne futuram eam, & stabilem, & sanctam? non ne communia uobis consilia, quæ ad salutem publicam spectent, omnia futura? non ne animos uestros (quod ex magnis inimicitiis accidere interdum solet) sicut paulo ante uehementibus odiis arserunt, sic pari nunc beneuolentia, & mutua flagraturos? præsertim cum Deus ipse suum opus, suum munus, suum beneficium tutaturus sit: cum nihil posthac uideatur posse accidere, sublatis omnium iã discordiarum causis, quod dissidium inter uos, contentionemue commoueat: cum tu, Cæsar, planissime, & certissime, pro tua admirabili prudentia iam intelligas, quanto expeditior, & paratior ad illa tua magna consilia exequenda futurus sis, adiuncto tibi per amicitiam Christianissimo Rege, quàm eodem odiis, diffensionibusq; seiuncto. Qui quidem Rex iam etiam tecum, non uno, neque simplici, sed pluribus uinculis copulatus sit, affinitatis olim, nunc etiam & fœderis, & \* sententiæ, & fortunæ ornatissimus Rex. Credas mihi hoc uelim, Cæsar, non enim res mihi ignotas profero, quæ etiam si dubiæ essent, nequaquam à me pro certis commemorarentur, sed uidi, sed interfui, cum mansissem apud illum aliquot mensibus Pontificis Maximi, sedisq; Apostolicæ Legatus, hancq; ipsam pacis actionem cum eo, causamq; tractassem.



D E P A C E

Et affem : ille (inquam) mihi mirabiliter satisfaciebat. Habebat tum arma in manibus, uiribus suis fidebat, dolore aduersus te, & ira commouebatur : & tantam sibi à tuis contumeliam in suis Legatis impositam nimis te tulisse negligenter conquerebatur. Sed tamen in illo tanto motu animi, & iracundiæ impetu sæpe flectebatur ad audienda consilia pacis. quam ego natuſ opportunitatem Regis rationi magis, quàm iracundiæ obsequentis, illius ingenio, & prudentia fretus, qua is insigni, & magna præditus est, eò tandem rem deduxi, ut ille ad extremum Pontificem Maximum arbitrum iuris sui, & omnium cõtrouersiarum, quæ inter uos essent, iudicem, moderatoremq. statueret. Sed in quo intimos eius sensus ego penitus perspexi, posteaquam non alienus à studio pacis esse cœpit, quotiens ille inter suos de hac pace uestra, & reconciliatione pristinæ gratiæ loquebatur? quotiens cum gemitu declarabat dolorem suum? quòd uestris illis tunc odiis, ac discordiis in ultimum discrimen Christianæ Reip. prope salus decidisset? quantopere optabat, quàm cupiebat? ut ambo unà animis, studiisque coniuncti, depositis inimicitiiis ea gereretis, eaq; susciperetis, quæ essent uestræ quidem potètiæ, uestraq; fortunæ : sed multo magis honori, nomini, uirtutiq; consentanea? quod nunc ita factum esse, uestrasq; mentes in unum, & eundem sensum amore, concordiaq; coisse, & Deo immortalis meritis, debitasq; gratias, quantacunque à nobis concipi, & haberi possunt, & tibi, Imperator, maximas habemus. Et si enim Christianissimi Regis grata nobis uoluntas, & animus est probatissimus, tibi tamen, in quo pacis,

&

& belli summum arbitrium inest, quòd saluos fore nos possumus iam sperare, referimus acceptum. Tuū est enim hoc beneficium, Cæsar; tua gratificatio; tuū munus; tua in omnes populos nunc se clementia, & bonitas effudit, quòd pacem Christianis populis præbuiſti; qua non solum homines, sed nimirum pecudes, agri, tectaq; lætantur. Quòd si tu is esses, qui magnitudinem animi tui spaciis, regionibusq; terrarum; nominis autem famam tempore aliquo definireſ: & satis multa iam extarent tuarum clarissimarum uirtutum indicia, ac monumenta; & nos hoc singulari pacis per te nobis redditæ beneficio contenti in præsentia essemus. Communi enim salute (quod ad tollendas intestinas discordias attinet) per tuam nobis prouidentiam constituta, cætera, quæ supersunt graui illa quidem, atque magna, Dei consilio, & futurarum rerum euentibus permetteremus. Sed cum nec tuus iste animus plenus maximarū, pulcherrimarumq; cogitationum conuiuſcere possit, donec ea pariat, quæ iandudum illi concepta sunt; & tua semper consilia spectauerint æternitatem, nec se ullis temporum curricula circumſcribi passa sint quid est iam, Cæsar, quòd tibi aut nos subiicere, aut tu per te capere, & deliberare possis? nisi illud extremum tanquam portum, ut nauigationum, sic præteritarum actionū omnium tuarum, ut terminos Imperii, & magnitudinis tuæ, in Turcarum, & Barbarorum regna promoueas, quæ ita tuæ uirtuti, atque laudi cum nostra omnium spe, tum Dei prouidentia reseruata sunt, ut de diuino consilio certe dubitare non debeamus. Quid enim fuit, quòd illius Imperio, & ditione inter nostrarum

D E P A C E

casiones discordiarum iis aliquot iam annis uehemēter auctis, Aegypto ad ueteres eorum opes adiuncta, Persis summotis, Illyrio uexato, uictis, & subactis Pannoniorum fortissimis gentibus, quas armis suis saepenumero ante lacefsitas, neque unquam domitas, audita pridem Cæsar, te pene inspectante, ante oculos (inquam) propemodum tuos, non uictoria, sed occasione oppressere: cum tu Gallico bello distractus, auxilium illis tum ferre non posses: quid fuit (inquam) quòd, cum insultarent maxime, cum urgerent, cum in nostro sanguine, nostrisq; cladibus insolentius quotidie, crudeliusq; debaccharentur, repente ista pax ex tantis, & tam implacabilibus inter uos (ut uidebatur) iris, atque discordiis, uelut insperatum de coelo lumen effulsit? Non ne hoc nobis indicauit Deus, & uoce sua quasi testatus est, uelle se eum, quem haberemus præcipuum tutorem, & defenso-rem Christiani nominis, à cæteris curis, & impedimen- tis liberare: quò is neruos omnes suos consilii, forti- tudinis, potentia, quibus firmis, & ualidissimis est præditus, in hanc unam cogitationem, & studium belli sanctissimi apparandi conferret? quid? in eodem te ab eodem Deo, nonne diuina illius mens, & uolun- tas nobis est significata? cum Christianis nationibus in plures principatus, uariaq; imperia, non tam diui- sis paulo ante, quàm fractis, ob eamq; causam armis Turcarum resistere minus ualentibus, quòd in diffi- cili consensione nostrorum illi uno capite, & uno cor- pore consentientes ingruebant; tu ab eo ipse Deo in tam multis sæculis unus electus es, in quem mirabili quadam, non fortuna, sed eiusdem Dei prouidentia, inopinatis

inopinatis quidem certe rerum euentibus , totum  
Christiani nominis robur conflueret : qui summum  
honoris in toto orbe principatum pari fortuna , & sa-  
pientia cumulares . Ergo hæc tibi , Cæsar, omnia ab  
Deo , & data , & parata sunt , quò aditus apertos ad  
res gerendas maximas haberes. nunc tibi uideudum  
ipfi , quid sis facturus . Pendemus de te omnes , qui  
Remp. saluam esse cupimus . ea porro nequit esse sal-  
ua , nisi Turcarum uires, animiq; frangantur : eæque  
ab illis prouinciæ repetantur , quas ipfi in amentibus  
discordiis nostris insidioso bellandi genere nobis sur-  
riperunt . Tu unus ad hanc actionem tantam, tamq;  
præclaram idoneus nobis diuinitus donatus es . Non  
ne ergo tua mens cum Dei omnipotentis iudicio de  
te, menteq; consentiet? Omnibus es munitus, Cæsar,  
instructusq; præfidiis, quæ ad huiusmodi bellum ag-  
grediendum sunt requisita ; uirtute, potentia , confi-  
tio, magnitudine animi , scientia bellorum gerendo-  
rum ; quodq; ad rem non mediocriter pertinet, pluri-  
mumq; in bellis ualere solet, militum etiam robore,  
& fortissimorum Ducum usu bellandi , ac peritia .  
Nanque hoc tamen commodi ex præteritis Reip. ma-  
lis, incommodisq; accepimus , quòd maximas ma-  
nus ueteranorum militum paratas, armatasq; habitu-  
ri sumus . Quid res gestæ tuæ ? quid tuus inuictus ani-  
mus, neque solum aduersus homines , sed contra ip-  
sam etiam fortunam, omnesq; casus humanos immo-  
bilis, atque constans , quem satis hostes nostri specta-  
tum habent , & cognitum ? quid nomen ? quid aucto-  
ritas ? quæ tanta in te est, quanta in omnibus Roma-  
nis principibus , post Theodosium , Carolumq; non  
F fuit ?

D E P A C E

fuit? parum ne illa hostes tuos deterritura est? qui quidem paulo ante, dum tu Gallico bello implicatus tenerere, tot, & tam magna timoris de te sui signa dederunt: maximas classes in auxilium Galliae miserunt: Italiae, & Siciliae littora depopulati sunt: Vienne urbem tuam, fratrisque tui clarissimi Regis ditionis obsidione tentauerunt: omniaque contenderunt, quod tu domesticis malis diutissime impeditus, ad eos accedere, & conuertere in illos iusta arma ne posses. qui te, cum tantopere formidauerint impeditum; solutum, & liberum quonam modo pertimescent? An tu praeter pietatem etiam tuam, praeterque munus officii, quod Christianae Reip. Imperator praefectus sustines, etiam illorum in te ipsum iniuriis, grauibusque contumeliis non commouebere? non illas ultum ibis, cum is sis, qui omnia potius perpetienda tibi ducas, quam ullam uel minimam uiolationem dignitatis tuae? Tu, qui paulo ante duobus potentissimis principibus resistebas unus, cum & Gallico bello occuparere, & eodem tempore Turcarum arma propulsaes; nunc Rege Christianissimo, nouo tibi foedere, nouaque beneuolentia adiuncto, qui antea quoque fraterna tecum erat necessitudine coniunctus; nouis, magnis, firmisque auxiliis auctus; cum, quod contra te erat, id pro te futurum sit, teque uehementer adiuuet, quod antea impediabat, nudatas spe, & occasione, qua maxime nitebantur, Turcarum uires non despicias? At permagno illi ualent equitatu, quo in genere tamen numero se magis, quam uirtute ostentant. non est omnino hoc de iis singillatim rebus loquendi, & deliberandi tempus, quod tum erit aptius, cum iam de-

creto

creto bello, aut uoluntate tua, Imperator, perspecta, ista suis locis uenient in consultationem. Sed tamen, si aliquid est à nobis aduersus hanc famam hostilis equitatus dicendum : nos , tametsi equites etiam nobis sunt , quos uirtus potius commendat, quàm numerus, non ne legiones præterea fortissimas ? non ne exercitatissimos in armis pedites obtinemus ? quibus carent illi , & in queis præcipuum exercitus robur , spesq; , & ratio uictoriæ certior locata est ? Nam equitibus quidem multæ formidines, & moræ, multaque obici impedimenta possunt, uel locorum , uel fluminum, uel militarium etiam inuentorum : quibus freti quondam populi Romani Duces, nunquam sibi ad committendum prælium cum hostibus , multitudinem equitum impedimento fore putauerunt : propterea quòd facile perturbatur id copiarum genus . Nam equi nec ratione doceri, nec cohortationibus confirmari queunt, ut stent, ut confidant, ut ne ulla obiecta formidine terreantur . Quibus de rebus memoria teneo tecum me , Imperator, ad Niceam esse locutum: cum ego tibi non nulla huiusmodi commenta , quæ ad turbandos equitatus hostium idonea esse uiderentur, exponerem : tu uero plura multo , & meliora prospiceres. Igitur indociles equi: at peditum ad omnem nutum & paratus animus; & ad uincendum pertinax est contentio . Nam quod ad copias , & comæatus , & ipsas pecunias attinet , quos neruos belli plerique uocauerunt, potest ne esse dubium , quin ciuitates , populi , Christianæq; nationes , quæ in hæc socialia bella inuitissimæ contulerunt, in hanc sanctam, & salutarẽ omnibus expeditionem libentissime sint,

D E P A C E

non tantum opes suas, sed corpora etiam, & liberos collaturæ? quanquam & bellum alere se ipsum solet, si ratione, & ordine sit administratum: quæ quidem ratio, uisq̄, prudentiæ in te, Carole, summa est, si in ullo unquam fuit. Quamobrem aggredere (quæsumus) hoc opus pulcherrimum omnium, & maximum, & cui tua magnitudo par sola est. Non est illud Imperatorium, neque Regium (crede mihi) contentum esse terminis, qui à maioribus sint relictis, aut proferre eos conari ex sociorum detrimentis, atque damnis: quasi parum multa sint in conspectu Barbarorum regna, parum multæ hostiles nationes, in quas iure inuadi, & quibus sancte bellum inferri possit: nec rursus dedere se deliciis, & uoluptatibus, id quod à tua mente semper abhorruit. Non enim tu ad ocium, nec ad desidiam, sed ad maximas semper res agendas, & cogitandas natus es. nullam habet maiorem iucunditatem uirtus, quàm recordationem rerum pulcherrime gestarum. nihil est animis præstantibus propositum ad diligendum, & cupiendum, quod finitum terminis sit. Caduca sunt enim, & fallacia omnia, quæ spatiis circumscribuntur: animos magnos, atque excelsos in immensum excurrere oportet, cum regionum, terrarumq̄; Imperio, tum famæ, & laudis in posteritate, tum uero beatitudinis, & felicitatis in illo coelesti, & immortali regno \*. Ad quod Regnum, Carole Cæsar, & ad quæ præmia, decreta, & constituta illis, qui diuinis muneribus ornati, ad eiusdem Dei gloriam cohonestandam usi sunt, tua te laus, atque uirtus, tuus iste longe præstans, atque eximius animus, tua natura, tua summa prudentia, tuus ille

notus

notus immortalitatis amor, tuæ curæ, tui tot antea a te suscepti pro Rep. labores, tuus honos, dignitas, estimatio: in primis autem in Deum, & Christianam religionem tua pietas uocat: ipsique nos cuncti (pro omnibus enim loquor) eundem te, & uocamus, & flagitamus: ut, cum gratias tibi tantas pro hoc exoptatæ pacis opportunissimo dono per te nobis concesso, datoq; debeamus, quantas persolvere non possumus, eò te sublatū gloriæ, amplitudinisq; uideamus, quò nostra desideria aspirare uix possint: &, cum omnia omnes egerimus, quæ uel in gratulando tibi, uel in gratias agendo, uel in celebratione tuarum maximarum laudum, uel in commemoratione rerum à te pulcherrime gestarum effici à nobis poterunt; nunquam tamen tam alte officiis ascendere ualeamus, quin diuina tua in nos, & in Christianam Remp. merita semper multo sint superiora.

IOANNIS



Faint, illegible text, likely bleed-through from the reverse side of the page.